

Raport iz Italije

Od "Sebilja" do Luke Leonea i Srebrenice

Zajednica građana BiH u Italiji realizuje veoma vrijedne projekte u kojima čuva i afirmiše kulturu i identitet Bosanaca i Hercegovaca



Piše: Enisa BUKVIĆ

Zajednica građana BiH u Italiji realizuje i dalje mnogobrojne aktivnosti. Uz one koje su već postale "standardne" djelatnosti, u pripremi su novi projekti. Redovno se radi na pripremi i izdavanju našeg on-line časopisa "Sebilj". Konstantno se održavaju kontakti sa Ambasadom BiH u Italiji, te razvijaju sve bolji i plodniji odnosi. Članovi Zajednice, uz saradnju Crvenog križa i italijanskog SFOR-a, rade i dalje na obezbjeđivanju liječenja u Italiji, prvenstveno djece iz BiH oboljele od leukemije, a one koji su na liječenju u rimskim bolnicama, redovno obilaze. Prilikom posjeta održavaju se kontakti sa ljekarima i obavljaju usluge prevodenja.

Zajednica građana BiH u Italiji zajedno sa udruženjem "BiH senza confine" iz Piacenze realizovala je od 27. do 30. novembra 2004. godine kulturnu inicijativu. Tom prilikom organizovana je umjetnička izložba uz učešće bosanskohercegovačkih slikara Mehmeda Zaimovića, Mevludina Ekmečića i Nisvete Kurtović Granullo. Izložena su i mnogobrojna književna djela od Predraga Matvejevića, Božidara Stanišića, Senadina Musabegovića, Luca Leone, Stefania Divertito i učešće izdavačkih kuća, "Bosanska riječ" iz Tuzle i "Hamlet" iz Švedske.

Od polovine prošle godine, pa, sve do danas naša Zajednica saraduje sa italijanskim piscem i novinarom Luca Leoneom koji ovih dana objavljuje knjigu o Srebrenici, pod naslovom "Srebrenica - i giorni della vergogna" (Srebrenica - dani (vrijeme) sramote). Knjiga sadrži mnogobrojne intervjue sa osobama iz BiH (Žene Srebrenice, Majke Srebrenice, Amor Mašović i sl.), zatim sa osobama iz internacionalnih organizacija (recimo, bolničarka koja je radila u organizaciji "Ljekari bez granica" i bila u Srebrenici za vrijeme genocida), zatim nekoliko italijanskih profesora iz oblasti internacionalnih odnosa i internacionalnog prava i drugima. Dosta dobar dokument.

Sada radimo na pripremi inicijativa u Italiji vezanih za Srebrenicu. Te inicijative predviđaju predstavljanje ove knjige, prikazivanje jednog dokumentarnog filma o Srebrenici urađenog od strane RAI-a i u nekoliko slučajeva predstavljanje jednog teatralnog komada o Srebrenici, u režiji Roberta Biagarelli. Već su planirani susreti u Rieti (19. marta), u Parmi (oko polovine aprila) i u Rimu, u junu.